

臣朱壽朋敬編

臣潘鴻鼎恭校

二月乙卯朔雪○諭本年輪應查閱山東河南江蘇安徽江西五省營伍之期山東卽派張汝梅河南卽派劉樹堂江蘇卽派奎俊安徽卽派鄧華熙江西卽派德壽認真查閱各省營伍均屬緊要豈容稍有廢弛近來防營積習如缺額扣餉等弊迭經嚴行儆戒不啻三令五申各該撫身處重寄務當仰體朝廷整飭武備之至意逐一簡校如有技藝生疏老弱充數及軍實不齊等事卽將該管將弁從嚴參辦毋得稍涉瞻徇以肅戎行○戶部奏御史楊崇伊奏各省荒廢官地請准民間承買收價報解一片光緒二十三年十二月十四日欽奉 諭旨戶部議奏欽此欽遵由軍機處鈔交到部據原奏內稱各省官地小民侵越者多臣愚以爲軍田屯田與其荒蕪不理不如准民典買租糧均有所出至業經移建之書院廢署基址或不在祀典之祠廟寺觀基址所在多有興修無期與其聽勢惡土豪暗中侵佔致滋糾訟不如官爲估價准民承買所收官價報解藩庫聽候部撥或亦不無小補應通行各省遵辦各等語臣等查戶部則例內載屯軍人等官給屯田民人私行置買該衛千總嚴行究治不行清查者照例議處又則例內載寺

觀各莊丁園丁名下領種地畝不准私行典買違者究治又例載各省叢林古剎舊經報官入冊齋田不許私相售買違者治罪各等語是軍屯各田本不容私相典買惟歷年既久荒蕪不理廢棄亦屬可惜臣等公同商酌應查照臣部則例變通辦理請旨飭下各省將軍都統督撫查明所屬地方究有軍田屯

田若干現在荒蕪未經開墾者若干應如何招戶認買收價升科納糧之處迅即奏明辦理至移建之書院廢署基址及不在祀典之祠廟寺觀基址雖臣部則例並無不准置買之條惟曾經報官入冊之齋田尙不許私相售買則廢基遺址亦可類推矣查此項廢地究屬無多一旦弛禁准民承買恐徒飽吏胥之需索無補公家之度支如有勢惡土豪暗中侵佔應由該地方官按律懲辦以警刁頑得旨如所議行

○丁巳祭先師孔子廟遣榮祿行禮○調俞廉三爲湖南布政使何樞爲山西布政使○依克唐阿奏覆陳籌餉練兵要策請飭戶部籌款開設銀行仿行鈔法軍機大臣奉旨著戶部核議具奏○祭

社稷壇上親詣行禮○予禮親王世鐸續假一月調理以恭親王署宗人府宗令奕劻署正黃旗滿洲都統○庚申總理各國事務衙門奏前於光緒二十二年二月間訂借英德商款一千六百萬磅約計庫平銀一萬萬兩奏蒙允准在案嗣經陸續提付日本賠款及威海軍費七千七百五十九萬餘兩加以訂購礮船等項僅餘二百數十萬兩而日本賠款尙欠七千二百五十萬兩若不續借鉅款照約於二

年之內全數還清則已付之息不能扣回威海之軍不能早撤中國受虧甚鉅且本年閏三月間應付之一千七百餘萬兩亦尙無從籌措上年十二月英俄兩國使臣迭向臣等商議借其國家之欸息扣雖較商欸爲輕而所索利益互相關鍵難以允從臣等籌思至再祇可仍借商欸以免輾轉然不先指定償欸則借欸仍歸無著中國借欸向指關稅作抵各關關稅每年約收二千一二百萬兩內提出使經費各關經費船鈔等項并提還以前借欸本息所餘無多不敷抵借至於鹽課地丁雖皆有著之欸然均係每歲正供不宜作抵且所收數目洋商不知若准令洋商照看更礙於俄法借款一體均需之條益恐別生枝節臣等通盤籌畫擬將蘇州貨釐松滬貨釐九江貨釐浙東貨釐宜昌鹽釐鄂岸鹽釐等項酌照廣東大廠辦法札派總稅務司赫德代徵以便按期拔付本息不致遲誤此項貨釐鹽釐每年約徵銀五百萬兩抵償借款當可取信洋商而他國不致有所藉口當將此意面告赫德令向英德銀行商辦經赫德與該行往復商論訂期續借金一千六百萬磅仍合庫平銀一萬萬兩開具草合同呈送前來臣等查合同所開周息四釐五毫八三折扣四十五年還清每四百磅用費一磅雖較前次英德借款折扣較重然前項周息五釐三十六年還清現欸周息四釐五毫四十五年還清每年少還本息銀十三萬一千七百二十餘磅亦可稍紓財力其餘各欸與前次合同不甚參差較之俄英兩國同時商借之欸利害相懸甚遠既

無誤日本償款之期亦免諸多要挾臣等公同商酌自可照此定議謹鈔錄合同底稿恭呈 御覽臣等

卽一面照案飭令總辦章京戶部司員與該銀行董事畫押訂明如期交款一面札行總稅務司並咨行

江蘇江西湖北安徽等省督撫欽遵辦理得 旨如所議行○辛酉諭毓崑等奏 惠陵工程緊要請派

大臣查勘辦理一摺 惠陵工程情形緊要著派啟秀前往敬謹查勘以昭慎重○壬戌諭軍機大臣等

都察院奏山西京官呈訴山西興辦鐵路流弊滋多請飭停辦一摺山西興辦鐵路前據該撫奏稱因所

產煤鐵各礦須修鐵路方能運銷現有皖粵各紳商籌借洋款來晉開辦當經降旨允其開辦並令預防

流弊酌定詳細章程奏明辦理迄今尙未奏到茲據山西京官呈稱該撫竟將潞州澤州沁州平定三府

一州典與洋人深堪詫異著將現辦情形及擬定章程刻日具奏原呈所指方孝傑劉鵬二員聲名甚劣

均著撤退毋令與聞該省商務又左都御史徐樹銘奏山西礦務鐵路宜歸紳民自辦各節著胡聘之一

併詳議具奏○陳寶箴奏臣於光緒二十二年准禮部咨山西撫臣胡聘之奏請變通書院章程一摺承

准總理衙門咨議覆刑部左侍郎李端棻奏請推廣學校一摺本年三月又承准總理衙門咨議覆安徽

巡撫鄧華熙奏籌議添設學堂請撥常年經費一摺均奉 旨依議咨飭通行仰見我 皇上獎勵實學

培養人材之至意欽感莫名自咸豐以來削平寇亂名臣儒將多出於湘其民氣之勇士節之盛實甲於

天下而恃其忠肝義膽敵王所愾不願師他人之長其義憤激烈之氣鄙夷不屑之心亦以湘人爲最近年聞見漸拓風氣日開頗以講求實學爲當務之急臣自到任迭與湘省紳士互商提倡振興之法電信漸次安設小輪亦已舉行而紳士中復有聯合公司以機器製造者士民習見不以爲非臣以爲因勢利導宜及此時因材而造就之當於本年秋冬之間與紳士籌商在省會設立時務學堂講授經史掌故與法律格致測算等實學額設學生一百二十人分次考選而延聘學兼中西品端識卓之舉人梁啟超候選州判李維格爲中學西學總教習另設分教習四人現已開學數月一切規模均已粗具省城舊有求賢書院現據改爲武備學堂略仿天津湖北新設規制以備將才而肄武事伏查鄧華熙原奏請於各省正款內每年撥欸一萬兩以充費用湖北武備學堂亦經奏准動用公款今湘省設立時務學堂武備學堂事同一律擬請援照每年於正款項下撥銀一萬二千兩酌充兩處常年經費自光緒二十四年爲始由臣在藩庫糧庫釐金局三處籌措分撥其京協餉及一切應解各欸仍照解不誤總計兩處學堂每歲經費約需二萬數千金除指撥正欸外所有不敷之項及建造學堂房舍之資卽由臣督率紳士另行設法籌措就地支給以期有成下戶部知之○癸亥諭前鋒統領載瀾奏拿獲烟館人犯請交部審辦一摺太監薛來喜等膽敢在禁城內開設烟館實屬目無法紀亟應從嚴懲辦所有拿獲之太監薛來喜蘇拉

姜文祥民人馮一馮奎陳三五名均著交刑部嚴行審訊按律懲辦○甲子命廖壽恆在軍機大臣上學習行走○戶部奏臣部議覆中允黃思永奏籌借華欸請設股票一摺光緒二十四年正月十四日具奏奉 上諭著依議行等因欽此臣部前奏僅陳借款大概情形至一切詳細章程聲明另行敷議自奉諭旨通飭遵行以後臣等連日督同司員熟計終始兼籌利弊擬定章程十七條內五條係臣部辦法十二條係中外通行辦法繕列清單恭呈 御覽一俟 命下卽由臣部知照禮部迅速鑄造昭信局印並分別咨行各省欽遵辦理再臣部原奏製造股票一百萬張每股銀一百兩現在遵 旨詳議章程統覈辦法酌製股票每票一百兩者五十萬張每票五百兩者六萬張每票一千兩者二萬張合銀一萬萬兩每股仍作銀一百兩按認股銀數領票以便什製合併聲明得 旨如所議行 昭信股票詳細章程一由戶部印造昭信股票編列字號每票一百兩者造五十萬張計股銀五千萬兩每票五百兩者造六萬張計股銀三千萬兩每票一千兩者造二萬張計股銀二千萬兩共合一萬萬兩由戶部設立昭信局遴選司員經理 一股票式樣前幅擬用四圍龍邊恭錄奉 旨年月並開每票銀數下半分二十小方書明年分銀數每年付還一次裁去一方後幅刊列簡明章程每票編列號數紙心及騎縫各蓋印一顆印花用朱色印泥每票除聯票外另繕號冊以備稽查 一擬咨行鑄印局鑄造銅印一顆文曰戶部昭

信局印遵用滿漢篆文以符定制 一選派廉勤司員經理昭信局公任責成局內設給票處收銀處各有專司不致紛雜先收銀後給票收銀處將收過銀數付至給票處驗明圖記花押卽將股票登明冊簿將股票當面點交本人稽覈之員逐日將收銀給票數目列單呈堂以備覈對冊簿登簿收掌皆司員專責至鈐印覈算皆由司員督同筆帖式及人役辦理該司員等始終出力應照異常勞績奏獎倘有疏忽貽誤罰亦從之若人役舞弊營私卽奏交刑部按律治罪 一製造股票刷印章程及各項經費應將需用數目覈實給發至局中常年辦公人役工食由臣部飯食項下酌量撥給 一擬在京師及各直省籌集庫平一萬萬兩紋銀略仿中西集股章程成式印造股票每票一百兩者五十萬張每票五百兩者六萬張每票一千兩者二萬張合成庫平紋銀一萬萬兩如有以各項平色及銀元交納者均准折合庫平就認股數目給予股票以昭信守 一此款限二十年還清周年以五釐行息遇閏不加增前十年還息不還本後十年本息並還本還則息減每屆還期官紳商民人等來取者隨帶股票呈驗自第一年起每付還一次卽剪去一方塊至第二十年本息還訖卽將股票繳銷 一戶部既設昭信局各省藩司亦應設昭信局冠以省名如直隸省卽曰昭信直局各省以此類推東三省由各該將軍派員設局以昭一律在京認股款交戶部昭信局照章領票在外認股款交各該省昭信分局領票或交股實號商代爲領票

款存該號候撥無誤亦可通融辦理惟該號商須有各商號連環保結報部報司有案始准承辦至認股之人或開列官闕姓名或堂名別號悉聽其便股票未發以前暫給印收俟股票刷成互換屆時由部局省局出示曉諭 一起息日期以交銀給票之日爲始原應足數一年付息一次惟給票有先後日期有參差將來難以截算擬第一年交銀給票之日起均扣至十二月底止將周年五釐行息銀攤勻按日計算共得本年給息銀若干發票時填明數目取息時照付光緒二十四年爲集股第一年應付息銀以光緒二十五年二月初一日起至二月底止付訖先期一月由戶部及各省藩司出示曉諭俾認股者無誤取息之期若逾期不取歸入下期並付以後第二年至第十一年均按周年五釐付息第十一年起每年付息時每百兩並預還本銀十兩第十二年以後至第二十年均按照股票內所載年限及本息銀數辦理自第二年至第二十年每年付息還本均以二月初一日起至二月底止付訖仍先期出示曉諭一歸還本息在京由戶部昭信局在外由各直省藩司昭信分局屆期憑票照章付給裁剪息票一方塊存局備查各省年終彙報戶部以憑總覈仍准股實號商代持股票赴局代領局中驗明憑據照數付給仍照章裁剪息票備查京外各商號自持票呈驗至發還本人不得稍有遲延及勒索扣剋情事一經查出嚴行懲辦至該商號承辦收發股票本息亦宜略酬其勞擬令京外匯兌此項票款概交該商號專辦

以資津貼 一股票每年應得息本准抵地丁鹽課一節原爲便民起見第思有股票之人未必皆有應交地丁鹽課之款若輾轉相抵又恐輻輳不清自以概由各局發給現銀爲妥俟各省集有股票若干報部後覈明每年應給本息若干先期由部指撥地丁鹽課等款如數截留以備臨時按票發給總期隨到隨發不稍遲延 一京局省局收銀給票及付還本息各顧攷成斷無毫絲出入倘各州縣印委及經手勸集之人有藉端擾累勒捐者准人告發或別經訪聞的確卽分別治罪如地方軍民人等有假造股票誑騙情事一經查實卽照偽造印票例爲首者斬 一股票准其輾轉押抵售賣與產業券憑無異惟抵押售賣仍應報局立案京外官員認票不認人各宜謹慎收儲倘有遺失應將股票某字某號如何遺失情形在京逕投戶部昭信局在外逕投藩司昭信局如離省稍遠卽報由該州縣轉報各該衙門立卽出示將此票禁止抵押售賣每屆付還本息之期如有持原票來取者卽行扣留根究如失主隨時將原票尋獲亦卽呈明原報地方官轉報存案倘三年不獲由局給予憑單將原票作廢所有應付失票之息本仍按認股年例給發 一凡京外官員認領股票後或調任他省或一再遷任或回原籍准在原領票處呈報卽於底冊內註明另給憑單一張註明股票號數蓋用印信如一人而票多者亦祇給一憑單註明票數號數令其持赴所到之省將憑單股票一並呈驗一面將發過憑單行文知照該省備案並報部查

致該省將憑單驗明蓋印連股票一併發還本人以後應付本息之期卽在該省支領若再遷調他省將所領憑單繳銷另換憑單仍前辦法各省凡有請領憑單之票另立一冊逐年登載每年各省各將收發憑單若干號年終截清報部以憑稽覈其各省商民有在他省認領股票後如有他故回籍者其呈照給單取息辦法均照此辦理 一各省收有成數聽候臣部撥還洋欸不作別用更不准勒令捐輸至以何欸付息還本臣部責無旁貸自應寬爲之備現籌裁減兵勇加增當稅覈扣減平養廉鹽飭加價漕糧減運丁漕折錢餘盈各的欸每年新增銀五六百萬歸還利息尙有盈餘至十年以後匯豐克薩洋欸已減復可騰出銀數百萬兩每年應還本利斷不至逾期 一各省官紳商民有一人勸集商民股欸至一萬兩以上及五十萬兩以上者准各省將軍督撫分別奏請由部覈給獎敘其由公欸提湊者不在此例 一除利息數目及還本年限永不更改外如有未盡事宜應行變通者隨時奏明辦理○戊辰中德膠澳租界條約成其文曰山東曹州府教案現已商結中國另外酬德國前經相助之誼故 大清國國家大德國國家彼此願將兩國睦誼益增篤實兩國商民貿易使之格外聯絡是以和衷商定專條開列於左

第一端膠澳租界 第一款 大清國 大皇帝欲將中德兩國邦交聯絡並增武備威勢允許離膠澳海面潮平周遍一百里內係中國里淮德國官兵無論何時過調惟自主之權仍全歸中國如有中國

飭令設法等事先應與德國商定如德國須整頓水道等事中國不得攔阻該地內派駐兵營籌辦兵法仍歸中國先與德國會商辦理 第二款 大德國大皇帝願本國如他國在中國海岸有地可修造排備船隻存棧料物用件整齊各等之工因此甚爲合宜 大清國 大皇帝已允將膠澳之口南北兩面租與德國先以九十九年爲限德國於所租之地應蓋礮臺等事以保地棧各項護衛澳口 第三款 德國所租之地租期未完中國不得治理均歸德國管轄以免兩國爭端茲將所租各段之地開列於後 一膠澳之口北面所有連旱地之島其東北以一綫自陰島東北角起至勞山灣爲限二膠澳之口南面所有連旱地之島其西南以一綫自離齊伯山島西南偏南之灣西南首起往笛羅山島爲限三齊伯山陰島兩處四膠澳之內全海面至現在潮平之地五膠澳之前防護海面所用羣島如笛羅山炸連等嶼至德國租地及膠澳周徧一百中國里界址將來兩國派員查照地情詳細定明在膠澳中國兵商各船與德國相交之國各船德國擬一律優待因膠澳內海面均歸德國管轄德國國家隨時可以定妥章程約束他國往來各船此章程卽中國之船亦應一體照辦另外決無攔阻之事 第四款 膠澳外各島及險灘德國應設立浮樁等號各國船均應納費中國船亦應納費爲修整口岸各工程之用其餘各費中國船均無庸納 第五款 嗣後如德國租期未滿之前自願將膠澳歸還中國德國所有在膠澳費

項中國應許賠還另將較此相宜之處讓於德國德國向中國所租之地德國應許永遠不轉租與別國租地界內華民如能安分並不犯法仍可隨意居住德國自應一體保護儻德國需用地土應給地主地價並中國原有稅卡設立在德國租地之外惟所商定一百里地之內此事德國卽擬將納稅之界及納稅各章程與中國另外商定無損於中國之法辦結 第二款鐵路礦務等事 第一款 中國國家允

准德國在山東省蓋造鐵路二道其一由膠澳經過濰縣青州博山淄川鄒平等處往濟南及山東界其

二由膠澳往沂州及由此處經過萊蕪縣至濟南府其由濟南府往山東界之一道應俟鐵路造至濟南

府後始可開造以便再商與中國自辦幹路相接此後段鐵路經過之處應於另立詳細章程內定明 第二款 蓋造以上各鐵

路設立德商華商公司或設立一處或設立數處德商華商各自集股各派委員領辦 第三款 一切

辦法兩國迅速另訂合同中德兩國自行商定此事惟所立德商華商公司造辦以上鐵路中國國家理

應優待較諸在中國他處之華洋商務公司辦理各事所得利益不使向隅查此款專爲治理商務起見

並無他意蓋造以上鐵路決不佔山東地土 第四款 於所開各道鐵路附近之處相距三十里內如

膠濟北路在濰縣博山縣等處膠沂濟南路在沂州府萊蕪縣等處允准德國開挖煤斤等項及須辦工

程各事亦可德商華商合股開採其礦務章程亦應另行妥議德國商人及工程人中國國家亦應按照

修蓋鐵路一節所云一律優待較諸在中國他處之華洋商務公司辦理各事所得利益不使向隅查此款亦係專爲治理商務起見並無他意 第三端山東全省辦事之法 在山東省內如有開辦各項事務商定向外國招集幫助爲理或用外國人或外國資本或用外國料物中國應許先問該德國商人等願否承辦工程售賣料物如德商不願承辦此項工程及售賣料物中國可任憑自便另辦以昭公允以上各條由兩國 大皇帝批准中國批准之約到德國柏林之後德國批准之約交結中國駐德國大臣收領作爲互換之據此專條應繕四分華文德文各二由兩國大臣畫押蓋印各執華文一分以昭信守○己巳祭 關聖帝君廟 上親詣行禮○予故哈密辦事大臣文麟附祀哈密古城專祠事蹟交國

史館立傳○徐樹銘奏國用之富藏之於民民富則君不致獨貧民貧則君不能獨富古之訓也況戶部籌款剖析毫釐無非取之於民大亂之後民氣未復何以支持然則莫如振斯民自有之利使之通力合作以收天地生產之精華而可以通商惠工以輔國用之不足者爲亟亟也從古大利在於農而泥之以天時之水旱不能全收其利是以西岐教民養蠶以補農政之不足周之祚延八百數十載而豳風諄諄於爰求柔桑以伐遠揚載績獻功與農政並重者所以導民以養之之政而可以爲教化之本也孟子言王道曰五畝之宅樹牆下以桑殷殷爲時君言之至再至三誠以爲欲重民生不能舍本務而但圖末藝

也況浙江之湖州湖北之武昌直隸之保定皆已舉行收有成效海內至廣高原宜山蠶下隰宜澤蠶北方養蠶晚南方養蠶早無不可以充民食資賦稅安忍舉此南北東西數萬里中之膏腴沃土而廢棄之臣以爲經國用籌兵餉之大者全在乎此其效與農等而無蠲租賑濟之害其利大於鹽而無鹽梟偷漏之害何所畏而不爲者仰懇 皇上飭令各省督撫一體飭令府廳州縣地方將蠶政事宜一一舉行遵者保薦違者參劾不得姑息亦不得聽其捏辭搪塞庶從古自然之利可以興矣 上諭徐樹銘奏請飭各省舉行蠶政等語蠶政與農工並重浙江湖北直隸等均已辦有成效各省宜蠶之地尙多卽著各督撫飭令地方官認真興辦以廣利源○庚午諭王毓藻奏覆陳籌餉事宜一摺據稱山東東海臨清兩關關稅前經提歸公項每歲八萬餘兩此外稅款較優各關請飭認真釐剔等語關稅爲餉源大宗自應實力整頓涓滴歸公各關稅款應提充公者諒亦不少豈容經收之員任意侵匿著各該將軍督撫破除情面認真釐剔查有應行歸公之款儘數提用據實報部倘再隱匿不報卽行從嚴參處將此通諭知之○劉樹堂奏臣於覆奏練兵籌餉案內將豫省礦務現有商人自借巨款前來認辦等情附陳在案現據翰林院檢討吳式釗分省補用道程恩培呈稱與義大利國商人北京福公司代理羅沙第立定合同借款一千萬兩設立公司請辦豫省礦務擬名爲豫豐公司并於原呈暨合同內聲明所借之款商借商還將

來如有虧折歸該公司自理所得礦利以百分之三十五分報効 朝廷較之官銀行以餘利百分之二十分報効實屬加增且開辦六十年以後所置辦礦產業全數報効送到華洋文一櫟合同三分保欸票一紙章程一分等因其保欸票者保其所借之欸有著也其合同所議則自借欸以迄開礦永遠遵行之信券也其章程則皆該公司開辦以後自行之事例合同保欸票兩項均已由義大利公使薩爾瓦葛填蓋印押作保 臣詳加察閱知其借欸委實非虛所擬合同九欸大致亦尙妥協惟其中稍有隱飾之處 臣以私意揣之大約洋商出財華商出力名爲自借洋欸實則以洋商而借洋債據吳式釗程恩培亦直言不諱而 臣之愚見尙以爲可行者竊以開礦非巨欸不辦巨欸非集股不成集洋股甚易集華股則難而定章則以集華股爲先集洋股爲禁是以洋商歆於美利欲染指而無由華商絀於貲財願効勞而寡助近年言礦利者紛然成效茫無所睹職此之由竊查借洋債與集洋股不同向爲功令所不禁而以華商而借洋債與以洋商而借洋債情形尤爲有異況爲洋商自借之債託名於華商在華商則有借欸之名並無借欸之實賠累可以無虞在洋商雖平分開礦之利並不總攬開礦之權操縱依然在我事之便利計無有過於此者且卽以華商獨辦而論無論貲本或集或借而開礦鍊礦之器具驗礦化礦之工程仍須仰給於外人是自以自有之財辦自有之礦利仍不免外溢況此貲本實出自洋商也且查合同第三欸

所開有該公司執事人等除西大班礦師機師工程師化學師外儘用華人等語該洋商所有之權明有
限制實與華商自辦礦務無甚懸殊臣先後接見吳式釗程恩培等深知其明於大義志在濟時必能力
顧大局若准其承辦此項礦務當克勝任現在時局日棘已准洋商在華設廠製造土貨此項礦利尤所
覬覦若不爲先發之謀恐難禁代庖之請惟事關交涉微臣未敢擅便謹照繕該商等議定合同呈請
聖裁如蒙 俞允再由 臣將合同加蓋 臣衙門關防分別存發俾昭信守并發給執照指派地方以便開
辦得 旨著總理各國事務衙門會同戶部議奏○辛未以 慈禧端佑康頤昭豫莊誠壽恭欽獻崇熙
皇太后駕幸頤和園 上詣瀛秀園門恭送○劉坤一等奏竊照太倉州及鎮洋縣詳稱縣境所轄之劉
河卽古婁江乃三江之一其水上承太湖從吳縣鮎魚口環崑山縣城繞太倉州城南入幹交口綿互七
八十里爲蘇松太三屬農田水利所關同治五年曾經奏請借款開濬由太倉等十六州縣攤徵歸還有
案迄今垂三十餘年潮汐往來沙泥停積淤墊日甚若不及早疏治設遇水旱偏災蓄洩無資爲患不堪
設想況江蘇漕糧出自水田水治則田資其利不治則田受其害是濬河尤爲當務之要節經該州縣稟
請開挑臣奎俊到任後卽遴派候選道錢志澄前往督同太倉州鎮洋嘉定二縣會同紳董親歷各段測
量勘估自殷港門起至浦家港口止工長四千一百餘丈所有挑工夫價以及築壩厚水等項經費約需